

आकाशवाणी

- प्रधानमंत्री नरेंद्र मोदी अज्ज मेरठ दे शताब्दी नगर नमो भारत स्टेशन पर मेरठ मेट्रो ते नमो भारत ट्रेन गी झंडी दस्सियै रवाना करडन।
- प्रधानमंत्री अज्ज दिने 11 बजे आकाशवाणी पर अपने माहवार रेडियो कार्यक्रम मन की बात दे राहें देश-बदेश दे लोकें कन्नै अपने बचार सांझे करडन।
- असम दे गुवाहाटी च लोकप्रिय गोपीनाथ बोरदोलोई अंतरराष्ट्री ब्हाई अड्डे पर नमां एकीकृत टर्मिनल अज्जै थमां चालू होई गेआ ऐ।
- भारत दा बदेशी मुद्रा भंडार जंदी 13 फरवरी गी खत्म होए दे हफते दे दरान 8 इशारिया 6-6-3 अरब डालर बढियै हुनै तगर दे सभनें शा उच्चे स्तर 725 इशारिया 7-2-7 अरब डालरें पर पुज्जी गेआ।
- अमरीकी राष्ट्रपति डॉनल्ड ट्रम्प होरें सुप्रीम कोर्ट थमां थहोए दे बड्डे झटके दे मगरा वैश्विक टैरिफ गी 10 फीसद थमां बधाइयै 15 फीसद करी दित्ता ऐ।
- मर्दे दे आई.सी.सी टी-20 क्रिकेट विश्व कप दे सुपर-8 मुकाबले च अज्ज अहमदाबाद दे नरेंद्र मोदी स्टेडियम च भारत दा सामना दक्खन अफ्रीका कन्नै होग।

<><><><><><>

PM-Train

प्रधानमंत्री नरेन्द्र मोदी अज्ज दपैहरी मेरठ दे शताब्दी नगर नमो भारत स्टेशन पर मेरठ मेट्रो ते नमो भारत ट्रेन गी झंडी दस्सिए रवाना करडन। ओहू मेरठ दक्षिण स्टेशन तक मेट्रो दी यात्रा बी करडन। एहदे मगरा श्री मोदी लगभग 12 हजार 930 करोड़ रुपे दी बक्ख बक्ख विकास परियोजनाएं दा उद्घाटन करडन। ते उनें गी राष्ट्र गी समर्पित करडन। प्रधानमंत्री इस मौके पर इक सभा गी बी सम्बोधित करडन। प्रधानमंत्री होरे 82 किलोमीटर लम्मे दिल्ली मेरठ नमो भारत गलियारे दी बी शुरुआत करडन। एदे च 5 किलोमीटर दा सराई कले खान ते न्यू अशोक नगर दिल्ली ते उत्तर प्रदेश च मेरठ दक्खन ते मोदूपुरम दा 21 किलोमीटर दा छिडा बी शामिल ऐ।

प्रधानमंत्री होर भारत दे सभनें शा तेज रफतार मैट्रो सरिस्ते दी बी शुरुआत करडन। इसदी रफतार 120 किलोमीटर फीह घंटे स्हाबै ऐ।

<><><><><><>

## PM-Man ki Baat

प्रधानमंत्री नरेन्द्र मोदी अजबडुलै 11 बजे आकाशवाणी पर हर म्हीने प्रसारित होने आले कार्यक्रम मन की बात राएं लोकें कन्नै अपने विचार सांझे करगंन। ए इस महावार रेडियो कार्यक्रम दी 131मीं किशत होग। ए कार्यक्रम आकाशवाणी ते दूरदर्शन दे समूलचे नैटवर्क AIR समाचार, डी.डी. न्यूज, AIR समाचार दी वैंबसाईट ते AIR दी मोबाईल ऐप्प पर बी प्रसारित कीता जाग। एदे कन्नो-कन्नी एह प्रधानमंत्री हुंदे दफ्तर ते सूचना ते प्रसारण मंत्रालय दे यू.ट्यूब चैनल पर बी प्रसारित कीता जाग। आकाशवाणी पर एदे हिंदी प्रसारण दे तुरत मगरा क्षेत्रीय भाषाएं च प्रसारण कीता जाग।

<><><><><><>

## AI Impact Declaration

India AI Impact Summit 2026 च AI Impact पर नमीं दिल्ली घोषणा पत्र मंजूर करी लैता गया ऐ। आर्टिफिशल इंटेलिजेंस पर वैश्विक सहयोग पर एह महत्वपूर्ण उपलब्धी ऐ। कुल 88 देशें ते अंतराष्ट्रीय संगठनें इस दा समर्थन कीता ऐ। ए घोषणा पत्र आर्थिक विकास ते समाजी कल्याण आस्तै AI दा लाह ठोआने पर व्यापक सैहमती गी दर्शादा ऐ। “सर्व जन हिताय- सर्व जन सुखाय” दे सिद्धांत थमां प्रेरित इस घोषणा पत्र च AI दे लाह मानवता दे सारे वर्गे तगर बरोबर रुप कन्नै पजाने पर बल दिता गया ऐ। इसदे च इंडिया AI इम्पैक्ट Summit 2026 दे त्रै सूत्र जन- पृथ्वी ते प्रगति आस्तै लगातार सहयोग दी वचनबद्धता बी जाहिर कीती गेई। घोषणा पत्र च AI इम्पैक्ट Summit दे 7 थम्मे दे मुजब अंतराष्ट्रीय सहयोग ते बहु-हितधारक सहभागिता गी मजबूत करने दा आह्वान कीता गया।

ए थम्म मानव पूंजी दे विकास- समाजिक सशक्तीकरण आस्तै पुज्ज बदाने AI प्रणाली दी विश्वसनियता- विज्ञान च AI दा इस्तेमाल- AI संसाधनें दे लोकतांत्रिकरण ते आर्थिक विकास ते समाजिक कल्याण आस्त AI दे सिद्धांत पर केन्द्रीत न।

<><><><><><>

## VP Coffee Table Book

उपरारष्ट्रपति सी.पी. राधाकृष्णन होरें कल नमी दिल्ली च 'अटल बिहारी वाजपेयी: द इटरनल स्टेट्समैन' नां दी कताब दा विमोचन कीता। इस मौके पर उनें आखेआ जे एहू कताब भारत रत्न अटल बिहारी वाजपेयी होरें गी श्रद्धांजलि ऐ। श्री राधाकृष्णन होरें आखेआ जे एहूदा प्रकाशन छडा तस्वीरें दा संग्रह नेई सगुआं श्री वाजपेयी हुन्दे जीवन ते विरासत दा उत्सव ऐ, जेडा राष्ट्र गी प्रेरित करदी रेई ऐ। श्री वाजपेयी हुन्दे कन्ने अपने नीजि सरबंधै गी चेता करदे होई उपरारष्ट्रपति होरें आखेआ जे उनेंगी वाजपेयी हुन्दे प्रधानमंत्री कार्यकाल दौरान लोकसभा सदस्य दे तौर पर सेवा करने दा सौभाग्य हासिल होआ हा। राधाकृष्णन होरें इस गल्ला पर जोर दिता जे वाजपेयी हुन्दा सांसद थमां प्रधानमंत्री तकर दा सफर भारतीय लोकतंत्र दी शक्ति गी दर्शान्दा ऐ।

<><><><><><>

## Guwahati-Terminal

असम दे गुवाहाटी च लोकप्रिय गोपीनाथ बोरदोलोई अंतरराष्ट्री ब्हाई अड्डे पर नमां एकीकृत टर्मिनल अज्जै थमां चालू होई गेआ ऐ। एहू असम दे विमानन बुनियादी ढांचे च इक महत्वपूर्ण बादा ऐं इस एकीकृत टर्मिनल राहें जात्तरिएं दी समर्थ च बड़ा मता बादा होने दे कन्नै गै समग्र परिचालन दक्षता च सुधार होने दी मेद ऐ। टर्मिनल गी घरेलू ते अंतरराष्ट्री जात्तरिएं दी सुविधा लेई डिजाइन कीता गेआ ऐ, जेहूदे च उन्नत सुरक्षा प्रणाली, जात्तरिएं दी सखलले ढंग्गै सिर आओजाई ते आधुनिक बुनियादी ढांचा शामिल ऐ। टर्मिनल दा उद्घाटन जंदी 20 दिसंबर गी प्रधानमंत्री नरेंद्र मोदी होरें कीता हा।

सोशल मीडिया दी इक पोस्ट च असम दे मुखमंत्री हिमंता बिस्वा सरमा होरं सोशल मीडिया दी इक पोस्ट च आखेआ जे टर्मिनल दा निर्माण मकामी भागीदारी कन्नै कीता गेआ ऐ जेहड़ा पूर्वोत्तर खेत्तर ते इक प्रमुख प्रवेशद्वार दे रूप च असम दी बधदी भूमिका दा प्रतीक ऐ।

<><><><><><>

### Forex Reserve

भारत दा बदेशी मुद्रा भंडार जंदी 13 फरवरी गी खत्म होए दे हफते दे दरान 8 इशारिया 6-6-3 अरब डालर बधियै हुनै तगर दे सभनें शा उच्चे स्तर पर पुज्जियै 725 इशारिया 7-2-7 अरब डॉलरें पर पुज्जी गेआ। भारती रिजर्व बैंक दे मुजब सुन्ने दे भंडार दा मुल्ल 4 इशारिया 9-9 अरब डालर बधियै 128 इशारिया 4-6-6 अरब डालर होई गेआ ऐ। बदेशी मुद्रा भंडार कुसै बी देशै दी आर्थिक स्थिति दी स्पष्ट सारत दिंदे ना।

<><><><><><>

### Court Avimukteshwar

उत्तर प्रदेश दे प्रयागराज च स्थित बशेश पाँक्सो अदालतै स्वामी अविमुक्तेश्वरानंद सरस्वती दे खलाफ बाल यौन शोषण दे आरोपें दी जांच लेई एफ.आइ.आर दर्ज करने दा हुक्म दित्ता ऐ। बशेष न्याऽधीश विनोद कुमार चौरसिया हुंंदी अदालतै पिछले हफते आशुतोष ब्रह्मचारी महाराज ते होरनें आसेआ भारती न्याऽ संहिता दी दफा 173 (4) दे तैहत दायर इक आवेदन पर सबूत दी जांच ते पीड़ित जागतें दे बयान दर्ज करने परेंत अपना फैसला सुरक्षित रक्खी लैता। याचिकाकर्ता नै बीएनएसी दी दफा 69, 74, 76, 79 ते 109 दे कन्नै-कन्नै पाक्सो कनून दी दफा 3, 5, 9 ते 17 दे तैहत मामला दर्ज करने दा निर्देश देने लेई आवेदन दायर कीता हा। अदालत नै याचिका स्वीकार करी लैती ते पुलस गी जांच दा आदेश दित्ता।

<><><><><><>

### Trump-Tariff

राष्ट्रपति डॉनल्ड ट्रम्प होरें अमरीका दी सुप्रीम कोर्ट सोयां थ्होए दे बड्डे झटके मगरा वैश्विक टैरिफ गी 10 प्रतिशत सोयां बदाईए 15 प्रतिशत करी दित्ता ऐ।

6-3 दे बहुमत कन्नै अदालत नै फैसला सुनाया जे अंतर्राष्ट्रीय आपातकालीन आर्थिक शक्ति अधिनियम कुसै राष्ट्रपति गी आयात पर व्यापक ते सर्वव्यापी टैरिफ लाने दा अधिकार नेई दिन्दा ऐ। इस फैसले कन्नै अरबें डॉलर दे रिफंड दावें दा रस्ता खुल्ली सकदा ऐ। कोर्ट दे फैसले दे किश गै घटें मगरा ट्रम्प पत्रकारें दे सामने आए ते टैरिफ दे इक नमे दौर दी घोषणा कीती जेदे करी सारत थहोई जे इस हार दे बावजूद उन्दा व्यापार एजेंडा अग्रे बदग। राष्ट्रपति होरें मौजूदा शुल्कें दे अलाबा 10 प्रतिशत दा नमा वैश्विक टैरिफ घोषित करी दिता। उने आक्खेआ जे राष्ट्रीय सुरक्षा ते व्यापार कन्नै संबंधित प्रमुख टैरिफ बिजन कुसै रुकावट दे जारी रोहडन। कोर्ट दे फैसले करी नाराज ट्रम्प होरें इसी बडा निराशाजनक दस्सेआ ते किश न्यायाधीशें पर दलेरी दी कमी दा आरोप बी लाया। कानूनी चुनौती दे बावजूद, ट्रम्प होरें आक्खेआ जे एह फैसला अमरीकी व्यापार नीति गी नमा रूप देने दे उं'दे जतनें गी घट्ट नेई करोग।

<><><><><><>

### Cricket T20 WC

आई.सी.सी टी-20 क्रिकेट विश्व कप दे सुपर-8 चरण च भारत अज्ज अपने पैहले मैच च दक्खन अफ्रीका दे खलाफ खेड्डग। एह मैच अज्ज संझा 7 बजे थमां अहमदाबाद दे नरेंद्र मोदी स्टेडियम च खेड्डेआ जाह्ग। भारती टीम ग्रुप स्टेज दे अपने सब्बै 4 मैच जित्तिथै अब्बल थाहै पर रेहूी दी ऐ। सुपर 8 च पैहले ग्रुप च भारत, जिम्बाव्वे, दक्खन अफ्रीका ते वेस्ट इंडीज़ न जिसले के दुए ग्रुप च श्रीलंका, इंग्लैंड, न्यूजीलैंड ते पाकिस्तान शामिल न। हर इक टीम अपने ग्रुप च 3-3 मैच खेड्डग ते अब्बल दर्जे दिआं दऊं टीमां सेमीफाइनल लेई अपनी थाह पक्की करी लैडन। तोआई, कल सुपर-8 दा पैहला मुकाबला कोलंबो च बरखा करी रद्द होई गेआ। एह मैच न्यूजीलैंड ते पाकिस्तान दे बश्कार खेड्डेआ जाना हा पर मैच रद्द होने करी इ'नें दौनें टीमें गी 1-1 अंक हासल होई गेआ ऐ।

<><><><><><>